

Dari Sebulan ke Sebulan

Sekolah-sekolah di Pakistan Barat telah diwajibkan mematuhi suatu tata-tertib baru yang diisyiharkan oleh kabinet Pakistan Barat yang diketuai oleh Malik Amir Mohammad Khan mengharamkan semua pelajaran tari-menari dan menyanyi di sekolah-sekolah perempuan. Di sekolah-sekolah campuran diperintahkan supaya mengasingkan murid-murid lelaki dengan murid-murid perempuan dalam semua kegiatan atau permainan di sekolah-sekolah.

Semua jenis tarian sekalipun khususnya untuk penonton-penonton perempuan sahaja tidak akan diizinkan.

Di sekolah-sekolah campuran murid-murid lelaki dan perempuan tidak dibenarkan berlakon. Sekolah-sekolah perempuan tidak boleh membenarkan tukang-tukang gambar untuk mengambil gambar-gambar permainan atau pertunjukan mereka kerana yang demikian itu boleh menimbulkan kecaman-kecaman. Di dalam permainan sukan pula diadakan peraturan bahawa apabila murid-murid perempuan mengadakan permainan sukan tidak boleh memakai “pakaian-pakaian yang tidak sopan dengan mendedahkan sebahagian dari tubuh masing-masing.”

Sandiwara-sandiwara dan rancangan-rancangan kebudayaan yang diadakan oleh sekolah-sekolah tidak boleh ditunjukkan kepada penonton-penonton yang bercampur jenis. Rancangan-rancangan pertunjukan sekolah lelaki mestilah ditunjukkan kepada penonton lelaki sahaja dan begitu juga bagi

sekolah-sekolah perempuan hanya dikhurasukan bagi perempuan sahaja – sekian diberitakan.

Engku Syed Mohsin, Menteri Muda Kebudayaan, Belia dan Sukan Malaysia (yang agama rasmi bagi kerajaan Malaysia, Islam) En. Othman Wok yang pernah berkata bahawa Jabatan Hal Ehwal Melayu PETIR bekerja menjalankan tanggungjawab sebagai orang yang beragama Islam di Singapura hendaknya membaca empat lima kali berita ini kerana amat sulit umat Islam akan mempercayai segala langkah yang lain dicakap – lain dikerjakan, tentang agama, kerana yang demikian boleh menimbulkan pertanyaan “mengapa mereka hanya berkata tetapi tidak beramal.”

* * *

Pertelingkahan-pertelingkahan telah timbul di Persekutuan Tanah Melayu mengenai langkah menyamakan hari tutup sekolah daripada hari Jumaat kepada hari Ahad. Menteri Pelajaran, En. Mohamed Khir Johari telah menuduh pemimpin-pemimpin PAS membuat fitnah terhadap kepada langkap kerajaan mengadakan cuti sekolah pada hari Ahad dan menyuruh murid-murid menggunakan “selamat pagi”, “selamat petang” dan “selamat malam”. En. Khir seterusnya menerangkan bahawa banyak anak sekolah ponteng sekolah pada hari Ahad kerana mengikut ibu bapanya bercuti. En. Khir menambah kata bahawa ajaran Islam kita tidak menyebut bahawa umat Islam mesti

bercuti dari matahari terbit hingga matahari jatuh untuk menghormati hari kebesaran Islam.

Di dalam persoalan ini, nampaknya kancah-kancah siasah masih galap dan di dalam soal-soal yang seperti ini tentunya menimbulkan kerugian kepada umat Islam disebabkan oleh pertentangan-pertentangan siasah yang tidak putus-putusnya itu. Di negara-negara Islam, Jumaat menjadi hari kelepasan. Di Parsi Jumaat menjadi hari kelepasan dan tulisan huruf al-Qur’ān masih mendapat tempatnya yang wajar. Kalau sungguh-sungguh untuk khidmat Islam mengapa tidak diusahakan supaya berbalik kepada kemahuan Islam apalagi agama rasmi bagi negara itu ialah agama Islam. Meninggikan kemuliaan Islam lebih baik dan bekerja menyatukan umat Islam diwajibkan kerana tidak ada ertiinya memeluk agama Islam kalau tidak mencari jalan merapatkan persaudaraan Islam. Mengapa cara-cara yang dibuat untuk berbantah-bantah?

* * *

Muktamar Kemajuan Islam yang akan diadakan pada 6 dan 7 Ogos di Kuala Lumpur sesungguhnya menarik perhatian seluruh umat Islam yang nampaknya telah dahaga mencari kata sepakat dan mencari persatuan daya dalam usaha-usaha menghadapi perkembangan Islam buat masa depan. Umumnya terasa bahawa dengan adanya pertentangan-pertentangan siasah Islam diumbang-

ambingkan dan dijadikan alat untuk maslahat sesuatu golongan dan daripadanya menimbulkan perselisihan pecah belah yang tidak habis-habisnya di tanah air kita ini.

Dengan sebab itu maka adanya kongres seperti ini masing-masing suka untuk bercampur dan mengetahui sampai di mana kelak ukuran yang diberi dalam menghadapi soalan-soalan yang akan datang dan bagaimana pelaksanaan yang wajib diselenggarakan untuk menjauhkan segala pertelingkahan di antara golongan dengan golongan – sama ada langkah politiknya ataupun di dalam persoalan-persoalan peribadatan. Masing-masing boleh membawa hujah dan penjelasan untuk mendirikan tujuan-tujuan mereka tetapi usaha-usaha itu tidak akan mungkin dapat berhasil jika tidak segala sesuatu diamalkan dan amal-amal yang dibuat itu hendaklah didasarkan kepada ikhlas.

Semangat yang akhir disebut inilah yang wajib dipupuk di dalam tiap-tiap anggota kongres itu. Kesedaran mestilah ditanamkan supaya menginsafi bahawa perjuangan menegakkan seruan Allah, menegakkan cita-cita Islam mestilah menjauhkan lebih dahulu segala maslahat diri dan kedudukan, golongan atau puak dan mengikhaskan perjuangan-perjuangan itu semata-mata untuk kebaikan agama Islam. Jika asas-asas ini tidak diutamakan maka sangat tipis harapan kongres itu kelak akan membawa natijah yang baik kepada perkembangan agama dan kemajuannya di tanah air kita ini.

* * *

Majlis forum anjuran Pelajar-pelajar

Pendidikan Kolej Islam telah diadakan dengan tajuk “Pergolakan politik di tanah air dan pembentukan masyarakat berbilang bangsa.” Di antara persoalan-persoalan yang timbul, daripada apa yang dapat dibaca, bagi menentukan bentuk bangsa Melayu dijadikan perbandingan, bahawa bangsa Arab menjalar dari Maghribi hingga ke Iraq dan *lichenology* bangsa Melayu melimpah dari Perlis ke Filipina, dari Makassar membawa ke Marukai. Umpama yang diberi: Bangsa Iraq ialah keturunan Arab tetapi berkebangsaan Iraq. Arab di Iraq tidak sama dengan Arab di Tanah Melayu. Arab di Tanah Melayu dengan pengertian perlombagaan negeri ini telah menjadi Melayu walaupun ia keturunan Arab.

Kalau hendak mempersoalkan keturunan bangsa di dalam sesuatu forum hendaklah dikaji dengan saksama. Di Iraq bukan semuanya orang-orang Iraq itu Arab bahkan orang-orang Kurdi, orang-orang berasal dari Parsi sekalipun berbahasa satu dan beragama satu namun dia bukan orang Arab. Demikian juga orang Maghribi, orang Mesir, walau mereka berkebudayaan dengan kebudayaan Arab dan berbahasa Arab dan telah menceburkan diri dalam hidupnya seperti orang Arab tetapi mereka bukan orang Arab. Di Iraq dahulunya berbahasa Parsi dan Mesir, sebelum ‘Umar ibn al-‘Āṣ (orang Arab) datang ke sana, mereka berbahasa dan berbangsa Qibti. Di Hijaz di sebelah selatan pun sekarang tidak dapat dicari, kalau ini pun hendak dijadikan asas, bangsa keturunan tidak dapat diadakan bangsa Arab dikecualikan barangkali di Najad sahaja atau di gunung-gunung di daerah

Ta’if dan seumpamanya. Di India juga juga¹ lebih banyak lagi rencamnya iaitu banyak daripada orang-orang India itu yang berasal daripada Arab tetapi telah menjadi India. Jadi kalau bijak pandai mahu membahas soal asal untuk mencari hujah dan penjelasan dengan sebarang tentunya jadi tertawan orang – membuat perbandingan yang bukan pada tempatnya.



Di Amerika Selatan didapati sejenis burung kakak tua yang sangat baik hati; kalau ia membuat sarang, maka sarang itu dibuatnya besar-besar mengandungi beberapa bilik yang lain. Kalau ada jenis burung yang lain hendak bertelur maka dipanggilnya burung itu masuk ke dalam salah sebuah bilik di sarangnya; sebagai menjadi tetamu kepadanya.

Melihat kepada hatinya yang baik itu maka penduduk-penduduk di kawasan itu menamakan burung itu “Kakak Tua Paderi” mengambil sempena atas kebaikan hati orang-orang paderi.

Penangkapan ikan di seluruh dunia di sepanjang tahun 1964 telah meningkat kepada rekod lebih daripada 51,600,000 metrik tan.

¹ Pengulangan perkataan ‘juga’ dalam teks asal.